

Date – 21/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoman Bana Kaih-Handholding Scheme chu ei leh bara hmasawna mai ni lovin, mipui rilru puthmang thlenga a tha zawnga siam that tumna policy a ni a ti.**
- 2. Mizorama Eirawngbawlna Gas pekchhuah kawngah harsatna lian tham a la awm lo.**
- 3. Prime Minister Narendra Modia chuan ni thmu cham turin vawiinah US a tlawh dawn.**
- 4. Myanmar tuilian avanga thi zat chu 293 an tling tawh.**

<><><>

CM

Chief Minister Pu Lalduhoma chuan an sorkar scheme tlangzarh thar, Bana Kaih-Handholding Scheme chu ei leh bara hmasawna mai ni lovin, mipui rilru puthmang thlenga a tha zawnga siamthat tumna policy a ni a ti.

Nimina Mizoram Civil Service Association General Conference vawi 48-na in Aijal Club-a hun a hmanpuinaah Chief Minister chuan he thu hi a sawi a. Langtlang leh mitin huapzo rorelna chu Civil Service kalphung awmsa a nih thu sawiin Chief Minister chuan sawrkar tharin a ngaipawimawh hle a ni a ti a. Handholding Scheme hi ei leh bara hmasawna mai ni lo, mipuite rilru puthmang thlenga siam that tumna policy a nih thu sawiin chu chu ngaihawimawh hmasaka nei zel turin MCS officer te chu a chah a ni.

Chief Minister chuan, kalphung thar chu tha tho taka tuipui turin MCS officer te chu sawmin State dangte umphak tura tang turin a chah a. Chief Minister hian MCSA Official Magazine RAHBI (10th Edition) a tlangzarh nghal bawh a ni.

MCSA Kalkhawmte hian resolution hrang hrang an pass a. Sorkar flagship programme ‘The Mizoram Bana kaih (Handholding) Scheme’ chu tha an tih thu leh an awmna hmun theuha theihtawp an chhuahpui tur thu an pass a. Mipuite hnena mamawh tha zawka pek a nih zel theih nan, District, Sub-Division leh Block-a hmasawna ruhrel, tun aia tih changkan a nih theih nan Sorkar-ah thlen ni se tih te an pass a ni.

<><><>

HEALTH MINISTER

Health Minister Pi Lalrinpuii chuan Mizoram nurse te chu an hnathawh phu lovin an hlawh a tlem a ti a, an harsatna sutkianpui turin theihtawp a chhuah reng thu a sawi.

Nimina Mizoram College of Nursing Multipurpose Hall, Falkawna, 37th Graduation and Lamp Lighting Ceremony 2024 a hmanpuinaah Minister chuan he thu hi a sawi a. Minister chuan nurse hna chu hna zahawm leh hna tha tak a nih thu sawiin sawrkar pawhinn a ngaih pawimawh thu a sawi a. Hmanni lawka India rama Nurse hnathawh tha chawimawina - Florence Nightingale Award, Mizo Nurse Pi H. Mankimi'n India President hnen atanga a dawng thei kha thil hlu leh ropui tak a ni a ti.

Minister chuan tunlai social media chak tawh takah nurse vin leh nurse sual chungchang hmuh tur a awm leh thin chu pawl a tih thu sawiin nurse te chu an tawngkam khat lek pawhin dam lo te a tidam sawng sawng thei a, midangte tanpui thei tura zirchhuak an nih inhrereng turin a chah a. Tunlai mila inher rem thiam tur leh hmasawn tumna rilru nei turin a fuih a ni.

Minister chuan Mizoram Health System Strengthening Project hnuaiiah World Bank Funding-in MCON thawmthat hna thawh mek a ni a ti a. Building sakna atan cheng Vaibelchhe 5 leh nuai 73 bakah hmanrua leh furniture tul lei nan Vaibelchhe thum pekchhuah a nih thu leh hna chu nikum August thla atanga thawh tan tawh a nih thu a sawi a ni.

M.Sc Nursing, kum khatah seat 25 leh Post Basic B.Sc Nursing, kum tin seat 30 zirna kum 2025 July thla atanga tan tura hmalakna neih mek a nih thu Minister chuan a sawi bawk a ni.

MCON hi GNM (General Nursing and Midwifery) zir theihin kum 1980 khan din a ni a. Kum 2005-ah B.Sc Nursing hawn niin tunah hian Nurse zirlai 131 an awm mek a. Zirtirtu 22 awm mekin non teaching staff 30 vel an awm bawk a ni. Vawiina Graduate thar te hi batch 16-na niin an vaiin 30, hmeichhia 28 leh mipa 2 an ni.

<><><>

SUPPLY

Mizorama Eirawngbawlna Gas pekchhuah kawngah harsatna lian tham a la awm lo.

Nimina Food Civil Supplies and Consumer Affairs (FCS&CA) Minister Pu B Lalchhanzova hova Supply Department hotute leh Mizoram LPG Distributor ten eirawngbawlna gas dinhmun an sawiho naah he thu hi tarlan a ni a, Minister chuan Mizoram in chak lakna kawngah harsatna a tawh mek laia Eirawngbawlna Gas harsatna lian lutuk awm lo tura theihtawp chhuahtu Supply Department hotute, Indian Oil Corporation hotute leh Mizoram LPG Distributor te chungah lawmthu a sawi a, heihtawp chhuaha tan la chhunzawm turin a chah a ni.

Meeting in rawtna a siam angin Mizoramin hniang hnar taka eirawngbawlna Gas a hmuh zel theih nan Indian Oil Corporation Limited hotute hnenah FCS&CA chuan lehkha a thawn nghal bawk a ni.

<><><>

UNNATI

Govt. Mamit College-ah 'One Day Sensitisation programme on UNNATI - 2024' chu Mamit Bawrhsap Pu Jacob Lalawmpuia hoin nimin khan hman a ni.

Bawrhsap chuan eizawna bul tana hma la tawh te puihna tur UNNATI - 2024 scheme chu Mamit District mipuite tana tangkai tak tur a nih thu a sawi a. He scheme-in a ken tel leh huamchinte department lama thuneitute zawt hreh lo tur leh, a dil thei tur an ni chiah lo a nih pawhin midangte hrilhhretu ni turin kalkhawmte a chah a. Mamit District chuan sawrkar laipui duhsakna leh tanpuina an dawn nasat thu a sawi a, Aspirational District atanga khaichhuah an nih theihna tura ngaihsak leh duat bik an nihna chhawr tangkai turin mipuite a chah a ni.

UNNATI Joint Director Pu PC Lalvuana chuan scheme chungchang sawifiahin UNNATI scheme chu bul tanna tur niloin, hmala tawhte tan a ni a ti a. Bank lam leh Department-te nena thawh dun ngai a nih thu sawiin, hrechiang duh tan engtiklai pawha zawhfiah theih reng an nih thu leh Mamit District atanga dil thei chin te'n ngaihven ngei turin kalkhawmte a sawm bawk.

Uttar Poorva Transformative Industrialization Scheme (UNNATI) - 2024 hi kumin March ni 9 khan tlangzarh a ni a, March, 2034 thlenga kalpui tur niin UNNATI - 2024 atana sum ruahman zat hi cheng vaibelchhe 10, 037 a ni.

<><><>

SIAHA PLASTIC

Central Pollution Control Board thuchhuak angin nimin khan Siaha Single Plastic (SUPs) Inspection team ten Siaha khawchhunga Dawr hrang hrang ah dan in a a phalloh plastic zuar an awm leh awm loh an enfiah.

Inspection team 4 ruat niin an ni hian thla tin Siaha khawpui chungga dawr hrang hrang an endik thin bakah DC, Siaha hnenah report felfai takin an thehlut ziah bawk a ni. Team member-te hi sawrkar department hrang hranga thawktute bakah tlawmngaipawl (MTP, MJA, MCHP) leh Joint VC aiawh an ni a, SP ruahmannain team tinah hian Police pakhat zel an awm bawk.

He endikna a an thil man te leh Pawisa chawitir zat chu cheng 3790 a tling a ni.

<><><>

GARBAGE VEHICLES TO PROTEST FROM MONDAY

Aizawl khawpui chungga bawlhhlawh paih lirthei hman man rualkhai leh mumal siam phutin bawlhhlawh paih lirtheite tun thla ni 23, Thawhtanni lo awm tur atang khian an tlan dawn lo.

Nimina Aizawl Garbage Truck Owners' Association (AGVOA), PPP Mode Bawlhhlawh Paih Welfare leh Sanitation Driver & Handyman Associatioan (SD&HA) ten Aizawl Press Club-a chanchinbumite an kawmnaah Thawhtanni atanga an din tur thu hi an sawi a. Pawl pathumte chuan bawlhhlawh paih motor hman man rualkhai leh mumal zawk, veng tin hlat dan mil zela siam tha turin AMC thuneitute hnenah vawi engngemaw zat an lo thlen tawh tih an sawi a. AGVOA chuan October ni 25, 2019 aṭang khan Bawlhhlawh paih motor hman man siam tha tur hian lehkhain vawi 8 lai an lo

thlen tawh tih an sawi a, hei bakah hian PPP Mode Bawlhhlawh Paih Welfare-te pawhin bawlhhlawh paih motor hman man siam tha tura ngenna vawi eng emaw zat an lo thlen tawh tih an sawi baw k a.

Hetichung hian in bawlhhlawh paih lirthei hman man veng hrang hrang hlat dan mil pawh ni lo, a kilometer ang zâwnga chhuta ‘rate’ inanglo tak an la hmang mek chu pawh an tih thu pawl pathum chuan an sawi a. Dik tak leh rualkhai taka bawlhhlawh paih lirthei hman man bithliah an duh ber chu rei tak an nghah hnuah pawh heti mai hi an dinhmun anih avangin Aizawl khawpui chhung mipui bawlhhlawh khawntu, AMC bithliah rate hmangtute chuan Thawhtanni atangin, ‘Tiam chin awmlo va din vek tur’ an ti ta tih an sawi.

Bawlhhlawh paih motor hi LMV, pick- up truck leh a tlukpui 69 leh MMV, 407 leh a tlukpui 82, a vaiin lirthei 151 a tlan mek a ni.

<><><>

PM US TOUR

Prime Minister Narendra Modia chuan ni thmu cham turin vawiinah US a tlawh dawn a. US a cham chhung hian Quad Annual Summit vawi 4-na Delaware-a Wilmington-ah a tel ang a. He hunah hian thu pawimawh tak tak sik leh sa inthlak chungchangte, technology chhuak thar chungchangte leh thildang an sawi ho ang. Hei bakah hian Prime Minister Modia hian Summit karlakah hian US President Joe Biden leh ram hruaitu dangte a kawm dawn baw k a ni.

A zinchhuah hmaa thuchhuah a siamah PM Modia chuan President Biden, Prime Minister Albanese leh Prime Minister Kishida te nen Quad Summit-a an inhmukhawm tur chu phurawm a tih thu a sawi a. An pawl indin chu ngaihdan thuhmun neia kalkhawm an nih avangin Indo-Pacific chhehvela remna, hmasawna leh hausakna thlen chu an tum be a ni a ti baw k.

US a a cham chhung hian Pu Modia hian India mite a kawm dawn baw k a. Company hotulute nen sumdawna chungchangah an inkawm baw k ang. Hei bakah hian United Nations' Summit of the Future ah Pu Modia hi a tel dawn baw k a ni.

<><><>

BHARAT NEPAL MAITRI YATRA

Union Railway Minister Ashwini Vaishnaw chuan nimin khan Bharat Nepal Maitri Yatra tourist train chu New Delhi-a Hazarat Nizamuddin Railway Station atangin a vailiam. Ni 10 chhung tlan tur Bharat Nepal Maitri Yatra hian India leh Nepal inkara sakhaw hmun pawimawh tak tak a palflang dawn a. Ni 10 chhungin he rela chuangte hian sakhaw hmunhlui India-a Ayodhya, Varanasi leh Sitamarhi leh Nepal-a Janakpur, Kathmandu leh Pokhara te an tlawh thei dawn a ni.

<><><>

MYANMAR

Myanmar tuilian avanga thi zat chu 293 an tling tawh a. Mi 89 chin hriat loh in an la awm. Tuilian hian Myanmar ramchhunga khawpui tam tak a chim a, heng zingah an hian an khawpui lian ber Nay Pyi Taw pawh a tel a. State

tualchhung chanchinbumite sawidanin tuilian tuar mi nuai khat sing ruk leh sang khat chuangte chu chhawmdawl na hmun 425 ah an cheng lailawk a. Tun tuma tuilian hi Asia khawmualpuia ram hrang hranga Typhoon Yagi in a thlen a ni a. Tualchhung thuneitute leh chhanchhuah hna thawktuten tuilian tuarte chhawmdawl hna an thawk mek a ni.

<><><>